

HIMPUNAN HADITH HARIAN JAKIM

Kategori : AKIDAH Syirik

Tajuk :

Menjauhi Segala Bentuk Syirik

Hadith :

Rasulullah s.a.w bersabda yang maksudnya: "Sesungguhnya tawar jampi, tangkal azimat, ilmu guna-guna (ilmu pengasih untuk menambatkan hati suami kepada isterinya atau hati isteri kepada suaminya) adalah syirik."

Riwayat Abu Daud dan Imam Ahmad

Huraian

Pengajaran hadis:

- i) Tawar jampi, tangkal azimat dan ilmu pengasih adalah haram di sisi Islam sekiranya ia mengandungi perkataan yang tidak difahami maknanya atau yang berdasarkan sihir, memuja hantu syaitan dan jin iblis atau yang mengandungi benda-benda najis dan kotor.
- ii) Perbuatan ini adalah termasuk dalam perbuatan 'syirik yang tersembunyi' yang diertikan sebagai mengiktigadkan sesuatu sebab itu dengan keadaan hakikatnya memberi kesan yang baik atau buruk, contohnya disebabkan tangkal azimat yang digunakan itu maka seseorang itu terselamat daripada bahaya dan sebagainya.
- iii) Kecuali jika ia menggunakan ayat-ayat al-Quran, nama-nama Allah atau sifat-Nya atau yang berbentuk zikrullah maka yang demikian tidaklah diharamkan.
- iv) Di antara perbuatan syirik tersembunyi yang lain adalah seperti;
 - a) Menanamkan perasaan takut dan gerun kepada kekuatan sesuatu yang lain dari Allah.
 - b) Menumpukan harapan kepada sesuatu yang lain daripada Allah.
 - c) Bersumpah dengan sebarang sebutan yang lain daripada menyebut nama atau sifat Allah.
 - d) Mengatakan: "Kalaupun tidak kerana pertolongan dia, tentulah aku tidak berjaya" dan sebagainya.
 - e) Mengatakan: "Kalaupun tidak kerana ayam berkokok, polis meronda dan sebagainya tentulah rumahku dimasuki pencuri".
 - f) Melakukan sesuatu amal ibadat atau membuat sesuatu pengorbanan, perjuangan, bukan kerana menjunjung perintah Allah tetapi untuk suatu tujuan yang lain.
 - v) Selaku umat Islam hendaklah kita menjauhi segala bentuk perbuatan yang mensyirikkan Allah kerana dosa syirik adalah dosa yang paling besar. Sebaliknya hendaklah meletakkan keyakinan bahawa segala sesuatu itu adalah bergantung pada takdir Allah dan keizinan-Nya jua.